



19 vir wildmisdaad aangekla

15 September 2020 | [Misdaad](#)

Wildmisdaad 7 - 13 September 2020						
			Verdagtes vas vir renosterstropery	Ietermagövelle	Steenbok-karkas	Voertuig
Nuwe sake geregistreer	Verdagtes in hegtenis geneem	Vuurwapens	4	4	1	1
5	19	2	Muskeljaatkatvel	Elandkarkas	Vlakvark-karkas	Ammunisie
			1	1	1	28

INFOGRAFIK: DNMH15092020 - JOHAN MATTHEE

1.



Francoise Steynberg - Altesaam 19 vermeende wildmisdadigers is verlede week in hegtenis geneem en aangekla.

Volgens die wildmisdaadverslag van 7 tot 13 September van die Namibiese polisie en ministerie van die omgewing, bosbou en toerisme is vyf nuwe sake aanhangig gemaak.

Beslag is op verskeie wildprodukte, een voertuig en 28 ammunisie gelê.

Vier verdagtes is in verband met renosterstropery of pogings daartoe in hegtenis geneem.

Drie mans wat glo 'n renoster in die Etosha Nasionale Park wou stroop, bly in aanhouding nadat hulle Maandag in die Outjo-landdroshof verskyn het.

'n Angolese burger, mnr. Joaqui Markulinus, en twee Namibiërs, mnre. Pentecosta Ruhozu en Ebson Kahuure Karipindikirue, het op klagte van die onwettige jag en sameswering van die onwettige jag van spesiaal beskermde wild ('n renoster) verskyn, asook die onwettige besit van 'n vuurwapen en ammunisie en dwarsboming van die gereg.

Hulle is Donderdag tussen Kamanjab en die plaas Marinhohe deur die eenheid vir beskermde hulpbronne (PRU) van Kamanjab vasgetrek, het die hoof van die Blue Rhino-taakspan, komm. Barry de Klerk, gesê.

“Na bewering is die beskuldigdes afgelaai om ‘n renoster in die Etosha Nasionale Park te stroop. Die polisie het ‘n wenk ontvang en het vinnig daarop gereageer,” lui Nampol se weeklikse misdaadverslag.

“Die drie is met ‘n .458-jaggeweer en 11 patrone van dieselfde kaliber in hul besit in hegtenis geneem.”

Die beskuldigdes se saak is tot 26 Oktober vir verdere ondersoek uitgestel, asook vir hulle om regshulp te bekom.

Mnr. Elifas Mwahindandje Mashuna is verlede Maandag in hegtenis geneem in verband met ‘n ou renosterstropersaak wat in Augustus verlede jaar by Omitara plaasgevind het.

In ‘n ou olifantstropersaak van 2018 het ‘n beskuldigde wat op borgtog vrygelaat is, mnr. Paulus Hamutenya, versuim om verlede Woensdag in die hof op Rundu te verskyn. ‘n Lasbrief vir sy inhegtenisneming is dus teen hom uitgereik.

By Oshifo is nóg ‘n Angolees, mnr. Nalimanguluke Kalimbo, en Namibiërs, mnre. Tyitokota Kalekela, Sam Mulilo en John Mulele, verlede Woensdag glo met vier ietermagôvelle en ‘n muskeljaatkatvel in hegtenis geneem.

‘n Zambiese burger, mnr. Nyambe Kanyebe, en ‘n Namibiese man, mnr. Tubakwasa Matota, is verlede Maandag by Katima Mulilo glo met ‘n vlakvarkkarkas in hul besit in hegtenis geneem.

By Ndiyona is mnr. Murauli Leonard Hamutenya en Mungamba Venantius ook verlede Maandag glo met ‘n elandkarkas betrap.

Sewe Namibiese mans, mnr. Frans Fesh Shigwedha, Teofelus Amadhila, Wilbard Hendrik, Johannes Jacobus, Adolf Imalwa, Andreas Jacobus en Levi Levi, is verlede Vrydag glo met ‘n steenbokkarkas in hul besit by Onaanda in hegtenis geneem.

Beslag is op ‘n voertuig, ‘n haelgeweer en 17 patrone gelê.

- francoise@republikein.com.na